

LOU GALETOU

FAI RIRE TOU LOU MOUNDE E N'ENGROGNO DEGU

" PER DEHARGNA LOUS LEMOUZIS "

CINQUIÈMO ANNADO - LIMERO 3

MAI 1939

DIE 50 LOU LIMERO (de 40 per an)

Abonamen :

PER AN, NO PECO DE CEN 50

Direct., Redact., Administraci :

LIMOGES, 21, rue d'Alsace, telef. 58-66

Chèques Postals : 127-63 Limoges




Photo Jovi

Qu'ei dins no vieillo galeiteiro qu'un foï lous meillours galetous :

Veiqui lo pãto dau galeitou dô mei de Mai

SEISSANT'ANS	Francis.	LOU MOUTOU	Limassou.
LA MOLINA EICOURCIDA	Lou viel Marsau.	TROP TARD	Jan dau Mas.
CHANTO ROSELLO (chansou)	C. Peyrat.	LOU CHAVAU MAU ETRILLA	Ch. de l'Etang.
LO CHASSO DE JANTISSOU	L. Dumazaud.	LOUS MALHURS DE BANERDOU	Jean de Glano.
LO REVENCHO DE CARLO	J. Arnaud.	LO PAJO DAUS AMIS	Foussinet.

O jour d'âici, gn'io mouyen de re lâ sei n'automobilo, e, lo meita dô ten, no bouno voiture de rencoun-
tro fario vôt'ofa. Soulomen, îô lo trouba de coustianço. Per coqui voû sirei tranquilei en nan veire ô

Etablissements BERNIS

"Service des Occasions"

31, AVENUE DE TOULOUSE, LIMOGES

Voû li trouberai lo voiture que vou fô, a d'un pri tout ô fe rozounâble.

GRANDE PHARMACIE BRUNOT 35-30, Place des Bancs LIMOGES



AUCUNE NE SERT MIEUX

Se bien pourta qu'ei necessari,
Per lou piti, mai per lou gran,
N'a cha BRUNOT, lou Pouticari,
O miel de to plaço dô Ban.



TOUTES VENDENT PLUS CHER

Expédition par retour du courrier dans toutes les directions

SEISSANT'ANS

De bravas flours ? Ei co mo fête ?
Nou : queu bouquet ve m'annouça
Que seissant'ans dessus mo têtô
Demo chabaran de passâ !
Ah coumo lou tem filo vite.
Rencuro plo lous jours d'antan
A li pensâ, iô n'en sai quite.
Que fâ de mai, à seissant'ans ?

Si caucu tuto sur mo porto
Co n'ei gro per me fâ lo cour,
Qu'ei lou medeci que me porto
De las mertis per mas doulours.
Ent'e ei lo, mo paubro jônnesso ?
Ente sount-is lous jours d'antan ?
Fô be suffri, dins so vieillesso !
Que fâ de mai, à seissant'ans ?

De veni viei qu'ei lo misero :
Un vai rundi tout près dau fe.
Lous roumatis vous fan lo guerro
Et lo goutto vous met à re.
Lous piaus touben, lo... vudo baïssô
Pus de forço ni mai d'allant
Veiqui tout ce que co nous laïssô
Quand nous passen lous seissant'ans !

Mâ qu'ei l'envio que nous demouro
Voudrias be prou qui fâ, lai fâ
Nio pas mouyen, co n'ei pus l'houro :
Cambe d'affrounts a supporta !
Lou boun Di n'ei pas rasounable
De fâ vieilli en nous laïssant
L'edeio, sei qu'un sio capable...
Quau malhur de vei seissant'ans. FRANCES.

CHAZ LOU BOULANGER

Un jour, un piti gouyat rentro chaz Moussur Garry, lou
boulanger de Saint-Pantaly.

« Bounjour boulanger, vous resto co beucop de po de
passat-hier ? »

- Oui, moun piti, beucop !
- Et perque vous n'en resto co tant ?
- Ne sabe gro. Tu iô sabeï beleu, te, pito râco ?

— Oui, Et sabe coumo foudrio fâ per n'en pas vei de
resto.

— Dijo iô me vite, t'auras un bouci de micho per to
peino !

— Eh be, per n'en pas vei de resto ne foudrio pas n'en
tant fâ ! »

Et lou gouyat prenguet sas chambâs en soun cô, sei
attendre lou bouci de micho.

LAS BOUNAS MEIJOUS

La fennas an toutâs meitie d'une machino
a cousei.

Las meillours se trôben chaz

JAYAT

18, rue du Consulat, Limoges

Un dans meillours relougers de lo villo quei

MARTIAL LARODIE

13, rue Darnet, Limoges

V'autreis l'y troubarez dans bijoux, de las
môtras, dans reveils, de las pendulas et ô fai
tout a fé bien las réparacis.

Per vei de bounâs récoltas, fô sennâ de
bounas granas.

V'autreis las troubarez chaz

L. VILLENEUVE

Marchand grainier

12, rue Othon-Péconnet, Limoges, Tél. 54-55

Lou peichadour bien arma soun mounta per
l'omi

Pierre VOISIN

lou spécialiste réputa per las gaulas las pû
soulidas. Qu'ei se que las mounto se mei mo.

Tout pour la pêche aux meilleures conditions

45, rue Adrien-Dubouché, LIMOGES

Que fô co din lo vito per esseï huroux ?

Uno bouno santa,

Uno fenno adorablo

Et un boun poste de T. S. F.

Per vei lo santa, faut vous sugna...

Per vei lo fenno idealo, faut la chercha...

Et per vei un bon poste de T. S. F. et pas
cher, faut na cha :

GERMANEAUD

20, faubourg de las arènes, Limoges

quo vous proumet de l'houras déliciensas si
vautreis sabeï fa fleurî l'amouf en ecoutant la
chansous.

Un troubo aussi din queu magasin : lus-
treis, lampas de chabei, potorio, flours d'ap-
partement.

Lâ molinâ eicourcîdâ

Gn'io beleur dou-trei an, per lo feiro dô Einoucen, Capi, meitodiei a la Fournieiro, se reite sur lo plaço do Tribunau, dovan un moudelou de peillâ ente li vio de tout : dô coutilloû, dô dovantau, dô caraco, dô gilei, dô vestoû... O se mete de foussinâ, e surtigue de dessou lou moudelou, de la molinâ a carreû e a grandâ rejâ negrâ qu'ô troubavo a so môdo.

« Cambe quelâ molinâ ? — Cen sô, disse lo fenno que vendio. » Capi vougue marchandâ, mâ lo fenno lou reite : « Nâ veire di loû gran mogosin, lâ meimo vouû la poyorei per lou min cinquante fran. — Sobei si lâ me n'iran ? disse Capi. — Foudrio la eissoyâ ; mâ â-vou dô canassou ? — Perque fâ dô canassoû ? quei boun per se bognâ, mâ n'ai gro meitiei per me billâ. — Vouû counprenei be, paubr'ôme, que ne pode pâ vouû eissoyâ quelâ molinâ sur lo plaço, entau, dovan tout lou mounde, e denguèro dovan lou Tribunau ; noû noû forian borâ. Mâ noû poden be veire, tout poriei, si lâ vouû van. Tenei-vouû dre. »

Lo fenno pôse lo cinturo de lâ molinâ sur quello de Capi, vise ente lâ tounbovan e li disse : « Lâ soûn en pau lounjâ, mâ qu'ei re. Vouû â be châ vouû caucu que poden lâ demeni, s'en fô mâ d'uno mo, e vouû reipounde que vouû sirei bien billa ».

Capi prengue lâ molinâ, paye e s'en one counten coum'un rei.

Riba châ se, so fenno li disse : « Que pourtâ-tu qui denguèro ? Ent'â-tu trouba quelâ molinâ ? — L'ai pâ troubodâ, l'ai chotodâ sur lo plaço. Pode n'en vei meitiei d'un momen a l'autre, que si devio nâ en caucoule n'ôrio belomen re de prôpe a me metre sur lou cû. Soulomen lâ soun tro lounjâ, foudro lâ eicourcî d'une mo a pû prei. A-tu ôvi, Louiso ? crede-t-eu a so fenno que mountav'ô groniei... — Qu'ei bien, qu'ei bien, disse-lo, pauso quelâ molinâ sur no sello di lo chambro. — Rôso, disse Capi a so fillo, tu li forâ otenci, te, si to mai l'ôblidavo, tu n'ôriâ mâ iô fâ.

Quinze jour apreï, Capi fugue opela a lo jandarmorio per dire ce qu'ô sobio d'un vesi que vio metu lou fe châ se. O vougue veire si li mancavo re per se billâ counvenablomen. O cherche sâ molinâ. L'erian ent'ô la vio metudâ e degu li vio re fa.

« Ah ! quelâ douâ femiei, se disse Capi, quan iô pense que lâ nan pa trouba lou ten d'eicourcî quelâ molinâ depei que iô ai domanda. Chôplâ, mai Minou, disse-t-eu a so bello-mai, que se troubavo per ozar di lo meijou, chôplâ, doubâ me quellâ molinâ, que n'en ôrai meitiei demo. »

Lo mai Minou qu'aimavo soun gendre (co se veï de là

ve) doube lâ molinâ de Capi, lâ tourne pôsâ sur lo sello, di lo chambro, e s'en one. L'ensei, lo Capido, en tournan de lo peichorio, vigue lâ molinâ e pense a ce que soun ôme li vio demanda. Lo coupe no bouno mo a la douâ chanbâ e surtigue perporâ lo legumo per pourta a lo villo lou lendemo. Lo fillo, que rentre oprei, per fâ lo soupo, vigue, ell'ôci, lâ molinâ, e pensan que so mai vio ôblida de lâ eicourcî, se mete ô trobai e n'en tire n'autre bouci.

Quan Capi vougue metre sâ molinâ, lâ li ribovan ô jonouei : « Per moun armo ! co n'ei pû de la molinâ queto ve, qu'ei de lâ culôtâ, se disse-t-eu. Mâ crese que co se pourto entau châ loû richeï ; iai vu coqui sur dô tableû. » Lo bello-mai, la fenno e lo fillo en vejan Capi entau billâ se reten-gueren de rire e counprengueren, sei se parlâ entr'eilâ, ce que vio riba.

Capi, per se bien fâ veire dô jandarmâ, mete un keipi qu'ô vio garda de soû vint-hue jour, e partigue.

Lou brigadiei de service a lo jandarmorio lou vise de bigouei e lou fogue siciâ. Quel abillomen li dijo re de boun. No minuto apreï, lou vesi de Capi rentre, mena per dôu jandarmâ. Lou brigadiei coumence de posâ de lâ quertî ô teimouen. O li demande dobor soun noun ; mâ lou paubre Capi, toû sunsi dovan l'eitalage de lo justico, se mete de beigâ (co li ribavo quant ô vio pô). « Me pèle Ca, ca, pi, pi... », disse lou molurou. — Ah ! pense lou brigadiei, qu'ei un paubre bobouilli que noû an fâ veni ; noû n'en tirovan re, e crese qu'ô domando a fâ soû besouen. Bertran ! crede-t-eu a d'un jandarmo que netiavo lo cour, fosei veire lou gobinei a quel ôme. »

Capi se laisse fâ, rentre di un counpartimen, e quan Bertran gue vira loû toloû, ô surtigue sei fâ de bru e foute lou can a lo grando curso. Un ne sobe jomai ent'ô posse. Si vouû n'en â de lâ nuvelâ overtissei lou « Galetou ».

LOU VIEI MARSOU.

Un viei proverbe dit qu'a no bravo teito tout va bien. Qu'ei beleur be vrai. Mâ lous chopeus de chaz LEBUR fan mier que co : mettez-lous sur no vorro teito, lo pareï bravo !

La Chapellerie LEBUR
et
LEBUR-MODES

Rue Adrien-Dubouché
LES MIEUX ASSORTIS DE LA REGION

No drollou que s'en vaï en balado, bien maiado ei meta maridado !... Drollas, courez vite chaz

QUEYROI 7, boulev. Louis-Blanc, Limoges

per maiâ votre parpaï !

Lou magasin ei toujours en brando de flour, coumo un vargeï au mei de Maï !



Lous meillours peichadours, lous pus malens païchen au lança, mâ per reussi fô vei daus clios coumo fô, de las lignas et de las gaulas expès. Per troubâ tout ce que lour fai meitiei, lour fô nâ chaz

COLOX, 8, rue Adrien-Dubouché
lo meillour meijou de Limogei per que las besugnas. Lo païcho daïbro, qu'is se depeïchant !

Pour vous, mesdames et pour vos enfants : poissons rouges, aquariums, bibelots divers.

LOU BOUN LIBREI !

LOU BOUN PAPIEI !

LIBRAIRIE PALISSON

E. DESVILLES, Succr, 5, place Fournier, Limoges. Tél. 27-52

Que parlo tabe patouel coumo françel

CHANTO ROUSSELLO

Beucop de notreis lectours dau biai de Sent-Alari, de Peïrobufiero nous an damanda no chansou sur lo Rosello.

Nous pensen lour fai plaisei en mettant dins lou Galetou : « CHANTO ROSELLO », de CAMILLE PEYRAT, un Lemousi pur sang.

Lou mei prouchen, nous mettran « LO ROSELLO », lo chansou de DEMAISON, n'autre Lemousi de Sen-Germo... ô be daus enviroûns.

V'autreis chôsirez quello que vous foro plasei.

LO REDACI.

Tout coumo so sor lo Brianço,
Tant chantado per Mazabrau,
Lo Rosello, de brau en brau,
Frilo en chantant so romança,
De Saint-Halari fasan lou tour,
De Saint-Bounet jusqu'à Lo Plancho,
Se veiria dî soun aïgo blanchô
Ente la trucha fan l'amour. } bis

(Au refrain.)

De Chabreli a Lo Grâtado,
Sous la vergnei bressan sous bords,
Ma fe countento de soun sort
Lo vaï de cascâdo en cascâdo,
Fincan Lo Rocho, Leyssorio,
Toujours plasen, jamâ mechanto,
Quante vous sei huroux lo chanto, } bis
Quand vous sei triste lo puro. }

(Au refrain.)

N'an be trôca penden lo guêro
Do fleuvei grands coumo lo mer,
Mâ pas un ne chantavo l'air
Que notre ri chanto d'enguêro.
L'un erio vert, l'autre rousseu,
L'un s'endurmio, l'autre buffâvo,
Et de lou veire io purâvo,
En pensant : tournarâ beleu ! } bis

(Au refrain.)

Loû pechadoû touto l'annâdo
Li venen tous de lo vilo,
Per posâ un pau de bilo,
Et fugi lou bru, lo fumâdo,
Et chassant envio, vanita,
L'eintantô tout lou mounde chanto,
Per glorifa d'uno vou lento,
Di lo Paix : lo Fraternalita ! } bis

(Au refrain.)

REFRAIN

Chanto, chanto, gento Rosello,
De Saint-Halari jusqu'à La Tour,
Chanto, to chansou m'ensurcêlo, } bis
Chanto Rosello, chanto toujours ! }

Troyes, le 31 janvier 1939.

C. PEYRAT.

Lo chasso de Jantissou

Queu paubre Jantissou de lo Pradello n'aguet pas de chanso lou jour de lo fermeturo de lo chasso. Coum'ô ribavo dins lou pra de las Bordas, ô aperceguet, darrei un plai, quaucore de negre que remudavo.

— Co deu eisse un sinliar, se penset-eu, ô deu veni de lo fourié de Sussa.

O eipanlet soun fusil, ajustet bien dins lo direcî dô « sinliar » e... pouïet sur lo gachetto.

Quai ! mas malarsoumen co n'ero gro ço qu'ô pensavo. Qu'ero tout bounomerî tou peï Tienissou que s'ero qui cata per fâ sous besouens. Lou paubre viei masset touto lo décharjo dins lou bas de las reins... Ô se meguet a credâ e a se plaignei. Jantissou, tout sansi, li pourtet secours et lou mener chas lou medeci. Aprei lou vei bien soigna, queu d'aqui li

faguet un « santificat » ente ô indiquet qu'ô li vio enlôva quatorze ploums de dins lou darrei...

Quand lou viei fuguet gari, soun prumiei trabai fuguet de nâ pourtâ plento countre queu meichant chassadour. Jantissou passet en correctionnello. Lou juge lou coundamnet a vingt sôs d'eimendo et a versâ a Tienissou no soumo de vinto-cinq francs per chacun dos ploums que l'ovian blessa.

Quand lou paubre Jantissou auviguet quello coundamnaci, o ne pouguet pas s'empeïcha de dire :

— Fe de plai, i'ai bien gu dô malhur. Co n'ei pas de chanso tout parei...

— Pourquoi ? damander lou juge.

— Perque, Moussur, si mô cartouchio ovio eitado chargâdo a ballo en plasso d'eisse garnido de ploums, co n'orio mâ fâ un crô et co ne m'orio mâ coûtâ vinto-cinq francs, tandis que coumo co vau eisse ôblija de deboursa treis cent cinquante francs !

LUCIEN DUMAZAUD.

La revencho de l'âne Carlo

Dins lou darrei limero dô « Galetou », i'ai legi l'istorio de l'âne Carlo a qui un ovio passa dô goudroun sous lo couo per lou fâ courre pus rede. Coumo i'ai bien counegut l'âne en questi, io vau, me aussi, vous parlâ de se.

Qu'ero no bouno bieitio, vaillento et amitouso. Lo n'ovio mâ un défaut : l'ero rancunièro et quand qaucu li vio fâ un meichant tour, lo se venjâvo segar.

Dins queu tems, vivio a Châteuniô un grand badau qu'un pellavo « Lou grand Frede de lo Coumbo ô Biô ». Qu'ero un viei droullau tallomen beu que si no pito drollo vio prei fanteisio de lou meimâ (ço que entre nous, ne risquavo gro d'arribâ), li ôrio fougut mountâ sur un tabouret.

Lou jour que lous oubrieis passerent lou goudroun sous lo couo de l'âne, lou Frede, que viguet lou cop, risset soun aisei. Carlo li n'en gardet rancuno et, coumo vautreis va veire, ô iô li faguet bien paîâ.

Cauque tem apreï, Jantou châret n'automobilo e vendet soun âne au pairou d'un cirque qu'ero de passage. Dous meis apreï, queu cirque baillavo no grando seanço a lo ballado d'Eymoutiers. Lou grand Frede li vio mena no pito drollo de Plainartijo aveique qu'un voulio lou fâ maridâ.

Quand lous « Gugusseis » agueren counta lours zinzoueinâs, lou patrou annouçet :

— Et maintenant, Mesdames, Mesdemoiselles, Messieurs, nous allons vous présenter notre âne savant Carlo. Il sait tout, il devine tout, et ne se trompe jamais. Vous allez en juger : je vais lui poser quelques questions et il va me répondre immédiatement.

Penden queu tem, Carlo qu'ovio recounegut lou grand badau, s'ero penso dins so teito d'âne :

« N'âias pas pô, moun gaillard; l'autre jour, tu risserei de me, chacun soun tour. Oro qu'ei ô meu. »

— Carlo, damandet lou patrou, quelle est la personne la plus amoureuse de la société ?

L'âne net directomen se plantâ davan lou grand Frede. Quis que lou counaissian se megueren a applaudi.

— Quel âge a ce Monsieur ?

L'âne baillet trento-dous cops de pauto per terro. Frede que ne chabavo mas de dire a lo drollo qu'o n'ero mas tourna dô service, venguet tant rouje qu'un petarou.

— Montrez-nous une personne qui ne met jamais d'eau dans son vin ? countinuet lou patrou.

Carlo tournet vite davan lou grand Frede... Et co fuguet entau per toutes las questis. Tout lou mounde risio. Lou grand badau n'en puravo de depie. Lo drollo aprenquet de quello feissou que soun galant rouflavo lo net, qu'ô pudio daus peds, qu'ô se cresio bassie et beucop d'autras chosas. Lo se sauvet vite et leisset lou Frede tout caquoû. Lou maridage fuguet cassa.

Qu'ei entau que se venjet l'âne Carlo que n'ero pas tant beitio qu'ô n'en ovio l'er mas que n'eimavo pas qu'un se moque de se.

JEAN ARNAUD.

Lou moutou

V'autreis devez vous suveni dau boun cure de Sen-Pampali qu'avio daus roumatis ?

Soun meriglie se pelavo Toni.

Is fasiant tous dous lou service de l'egliejo dau mier qu'is poudiant et tout lou mounde erro counten.

Un beu jour, lou bru courguet que de las tornas se permenavant toutes las nets dins lou cementeri.

Lou cure penset que foulio chassâ quelas tornas que fasiant pô a sous paroufiens.

O n'en parlet a Toni.

— Per me, disset lou meriglie, iô forio no benedici touto lo net dins lou cementeri.

— Tu parlas bien, te, mas tu sabeis be que mous roumatis m'empaichen de marchâ et que iô ai toutes las peinas dau mounde a mettre un ped davan l'autre.

— Io sabe foutre be, mas poden-nous laissâ lou cementeri entau ?

— T'as rasou, mas fô que nous li siant tous dous, sous, et, pertant, foudrio caucu per me pourtâ !

— Iai n'edeio : si vous pourtavo sur moun echino ? Co n'ei pas trop loin et vous nê sei pas bien pesan.

— Qu'ei, mo fe, no bouno edeio, prouffitant dau brave temp. Nous li niran dem'ô sei.

— Entendu, disset Toni, dem'ô sei, devers la huet, nô hourâs, veindrai vous charchâ !

L'endemo, qu'erro mai que de net, dous voleurs parlant davan lo porto dau cementeri.

— Qu'ei entendu, disset lou prumié, iô vau t'attendre tant que tu niras queri lou moutou; ente vau iô me cata ?

— Ne sabe gro... das, dijo si tu rentravas dins lous cementeri, degu li ve depei que nio de las tornas !

— Quei be vrai, li pensâ-vo pas. Li vau !

O rentret et se sicliet sur no toumbo un pau loin de lo porto.

O bout d'un momen ô ôviguet marcha et ô viguet n'home que pourtavo caucore de blanc sur soun échino.

O penset que qu'erro soun camarado que pourtavo lou moutou.

— T'as be têt gu fa, disset-eu. Ei-t-eu gras ?

Mâ qu'ero Toni que pourtavo lou curé en soun surplus. O prenguet pô d'ôvi quello paraulo et credet : « Ah moun Di ! qu'ô sio gras, qu'ô sio magre, veilou te qui. » O foutet lai lou curé, lou bénéitier mai lo crou et se sauvet tant vite qu'ô pouguet.

Lou voleur se sauvet de soun coûta et lou paubre curé que ne pudio pas se levâ, se mettet de credâ coumo un perdu.

Qu'ei lou cantouniel que lou masset en nan à soun trabai à lo piquetto dau jour, mâ cresez me si v'autreis volez, sous roumatis fugueren garis et la tornas ne tourneren pus.

LIONASSOU.

HENRI ESDERS

O vend boun et boun marchâ et n'ien n'ô per toutes las boursas
RUE ADRIEN-DUBOUCHE, A LIMOGES

Is disen que tout ei char. Co n'ei gro vrai. V'autreis verrez qu'un po vef no bravo garnituro de chambro per pau d'argent, si v'autreis âs lo bouno edeio do nâ fâ no visito a

L'AMEUBLEMENT GÉNÉRAL (Union des Fabricants)
Limoges — Place de la Motte — Limoges

TOUT CE QUI CONCERNE L'AMEUBLEMENT
Tous genres — Tous prix

BEVEZ LOUS NUVEUS
SODAS LAPLAGNE

Pur sucre - Digestifs - Rafratchissants

TROP TARD !

Lou jour de lo feiro d'abri, seguio de l'ei moussur Francei, lou grand counaissour de betiaû, que passâvo lestomen dins lou reng de las junjâs, et las magnâvo sous lo couo, coumo co se fai per veire si las sount bounas. O li se prenio si be que las paubras petiâs plejovan l'echino en ecartant las jarrâs per se fâ chatingliâ.

« Moussur Francei, dissei-iô, vous sei toujours jône, et vôtro mo ei denizâdo coumo a vingt ans !

— Aguessâs-vous mordu vôtro lingo et fuguesso co vrai ! faguet-eu. Co ne vai pas en se douban. N'ai pus de forço, ni dins lous reins, ni dins las chambâs, ni belomen en degunle. »

Et coumo sous marchas erant chabas, ô me prenguet sous lou bras.

« Fai mechant veni viei, disset-eu. Nous n'en parlovan, pas pus tard que passat-hier, me et lo Marioun qu'ei de mo cliasso que minjo, coume me, dins sous seissanto-dies ans.

» La rencountrei dins lo vio de lo fount, a râso de net. Lo paubro vieillo gemâvo en pourtant sas douas seillâs d'aigo. N'en prenguei uno. — Te suveneî-tu, dissei-iô, quant venio t'attendre per essayâ de t'embrassâ, et qu'eversâvo to gerlo au mitan dau chami, per te fâ tournâ virâ et fâ durâ lou pla-sei ?

» — Pardi, si m'en suvene. Et te, Francei, te suveneî-tu quant tu veniâ m'aidâ gardâ las vachas dins lo grando boueijo ? Nous fasian lous roudelous, nous dansovan, nous alluchovan, et quant n'erant bracas io me sicliavo darei lou plai, tu t'evenlovâ davant me et tu me visovâs sei re dire, coumo no sainto vierjo.

» — Si te disio re, Marioun, co n'ei pas l'envio que me manquâvo. Iô n'en lebrêtâvo de te damandâ no pito per-meci. Mas n'ôsâvo pas.

» — Et me, que ne dermio pas lo meita de lo net, et que me disio tous lous mandis, en me frisant : Ei co huei qu'ô vai me damandâ ? Quant un ei jône, moun paubre Francei, un ei trop bêtio, un ne so pas proufitâ dau boun tem !

» Tout en parlant, n'erant ribas davant so porto. Lo me disset : Châbo d'entrâ. Vaû fâ un boun roudaû de fe, et nous passaran un piti momen ensemble, en parlant de notre jône tem.

» Chabei d'entrâ. Lo lumet lo lampo. Mas quant viguei que lo paubro vieillo pudignouso, touto dechapiâdo, tout edentâdo, qu'avio de grossâs cillâs bourudâs et de lo barbo sur las jorâ, iô pensei que tout lou fe de l'enfer ne sirio pas de trop per m'echaurâ.

» — Siclio-te, Francei, disset-lo.

» — Neî gro, repoundei-io, qu'ei trop tard.

» Lo viset lo pendulo :
» — Co n'ei mas siei houras, co n'ei pas tard.
» — Tu cresei, Marioun ? Eh be, ne saîs pas de toun avis. A notre âge quant qu'ei siei houras qu'ei tem de se retirâ ! Bounsei, bouno net. Et ne fasâs pas de mechants raibeis !

» Et io passei lo porto en baissant l'oreillo.

» Mettez-iô dins *Lou Galetou* per que votreis jôneis abounas n'en fasan lour proufiet. Co n'ei pas quant l'o passa flour que faut culi lo roso ! »

Eh be, Moussur Francei, tant piei per vous. Co li siro dins *Lou Galetou*. Et coumo qu'ei lou journaû officiel de toutâs las fennas dau pays, vous repoude que las bargeiras van vous laissâ tranquile.

Las se diran : Queto ve qu'ei chaba. O iô o fa mettre sur lou journaû, ne faut pus countâ sur se !

JEAN DAU MAS.

Lou chavau mau etrilla

Marsau de Vermont tournavo de lo feiro de Sen-Lionard dins so jardiniero, talado de soun chavau Poulou.

Riba au pount de Noblat, en passant davant un'auberjo, ô s'oviguet credâ. On s'arretet et viguet se preimâ un de soûs camaradas, Noni de Peiras-Blanchas, village tout près do seu, que li disset :

« Pourrias-tu me fâ menâ, per m'entournâ châ nous ?

— Vole be, disset Marsau, mounto. »

Veiqui que Noni, qu'ovio un pau tro bogu, se mettet a li dire, avant de mountâ :

« Tu n'as pas hounto, per un richard coumo te, de vei no charreto si mau foutudo et un chavau si mau etrilla ? »

Co ne faguet pas plosei a Marsau, co se coumpren, aussi ô passet un boun cop de fouet a soun chavau, en disant a Noni :

« Bouei, lo lebre n'ei pas etrillado, mai lo court be bien. Hue ! Poulou ! »

O laisso moun paubre Toni tout mouqua au miei de lo routo et li laisset fâ, a ped, lous douje kilomètreis que li vio per nâ a Peiras-Blanchas.

CHARLE DE L'ETANG.

LA VOITURE AUTOMOBILE POUR TOUTES LES BOURSES

Vous en avez besoin d'une... voyez les occasions de la

MAISON HUGUES

28, avenue de Juillet -:- LIMOGES



Exposition permanente de :

Citroën 7 et 11	Berlines traction avant	Renault Celtaquat	Sup. conduite 1937
— 8 et 10	Conduites et commerciales	— K Z I	Cond. et marchande
— C-4 F	Conduite et fourgon	Licorne 5 CV	Cond. et cabriolet
— B-14 G	Conduite et marchande	Mathis 7 CV	Cond. et cabriolet
Peugeot 601	Sup. conduite familiale	— 9 CV	Belle conduite 5 places
— 301 D	Sup. conduite 6 places	et 25 voitures tous modèles, tous prix	
— 201	Belle conduite 5 places		

Lous malhurs de Banerdou

Banerdou bourravo après lo porto dau médeci en credant :

« Levas-vous vite, Moussur, vous n'en preje, co praïssou, fasez vite, siô plâ ! »

— Davale d'abord, repoundet lou medeci.

Ah ! qu'ei te Banerdou ? faguet lou medeci quand ô debriguet lo porto et vequet queu que fasio tant de brut. Que nio co dounc per que tu venies me fâ levâ a queto houro ?

Ehbe ! veiqui Moussur.

Iô devio prenei, à mieinet, lou tren de Sen Junio que se reito Aïssou, per nâ ô batime de mo neço, vous sabez be, lo fillô de moun frai que s'avio maridado en losor dau fi dau frai de lo Catillo, qu'ei lo cousina en segoun de moun cousi dau Mas de lo Briango !

— Oui, oui, sabe, sabe ! disset lou medeci que se perdio dins queu parentage.

— En routo, faguei lo rencountro de Cournudo, qu'ei brigadier ô dragous, à Limogei.

Mo fennô, que devio veni, me disset depei lou mati que l'erro malaudo, lo demouret à lo meijou et partiguet tout sou.

Iô platusseï coumo Cournudo un boun momen, trop lountem, pardi, per mour que quand ribei à lo garo, lou tren erro parti.

Coumo de segur, m'entournei chaz nous mâ qu'erro tard et per ne pas reveillâ nôtro fennô io me debilleï sei lumâ lo tricita.

Mâ lo fennô m'oviguet et lo me disset en se plagnant :

« Qu'ei te Banerdou ? t'as manqua lou tren beleu ? »

— Oui !... qu'ei lo fauto de Cournudo que iaï trouba en chomi.

— Ah ! moun paubre, depei que tu seis parti iaï eitâdo bien malaudo, ne pode pas me tenei. M'eivi que vau passâ, vai vite queri lou medeci, et, surtout, ne maniâ pas lou boutou, lo cliardo me fai mau ! »

Lou medeci qu'ecoutavo Banerdou, perdet pasingo, lou viset de lo tête ô peds et li disset d'un er moucandier :

— Vous sei mobilisa, beleu !

— Noun gro, Moussur.

— Pertant vous as dau pantalous de soudard.

— Ah, fe de Di, disset Banerdou, en se taisant, qu'ei en pau fort !

— Que nio co ? disset lou medeci.

— Co nio, co nio, que qu'ei juramen las malinas de Cournudo !

JAN DE GLANO

De là ve un chôsi de brave popiei per topissâ no chambro : Gnio dô ôseu, de brovâ flour; mâ lou soulei que tapo dessur e lo poucheiro l'an tô bima.

Ei be un po nichivâ qui oinei en prenan do popiei SANITEX que ne chagnio pas de coulour e se lavo coumo no telo cirado.

Courez n'en chatâ châ GRANY, lou droguiste de lo plaço dô Carmel.

Lo pajo das amis

N'ami dau « Galetou », que demouro dau biais de Neissou, et que se sinno « Cadet », nous dit entaù :

« Qu'ei plo brave per v'autreis d'imprimâ tous qui coumpliments. Mas depei lou tem que co duro tout lou mounde so be que, « Lou Galetou », qu'ei chaque mèi, coumo no pinto de houn vi de Champagno : co reveillo lous vieis, co fai chantâ lous jôneis, et co fai passâ de las frissours dins lou parpat de las drollâs. Toulas las lettras de felicitaci co ne nous dit re. Coumo lou journau n'ei pas deja trop grand, n'aimorian mier un pau mais de gnorlas. »

Quel ami parlo en dret et rasou. Nous ne soun pas daus « peto-vanto ». Nous gardoran lous coumpliments per n'autreis. Mas quand dins lou moudelou de lettras nous trouboran quauco zinzouenno bien virado, o be quauque piti mout ple de malico nous l'imprimaren, et co faro plasei a tout lou mounde.

Lo lettro dau Geai de Fargeas n'ei pas no gnorlo, mas lo vaù be lo peino d'eissei cougnado dins « Lou Galetou ». Ecoulas-me co :

« Lous medecis, noun pas ordrenâ tant de mertis que coûtèn lous oueis de lo lêto, durian recoumandâ « Lou Galetou » per mour que lou rire est lou meillour daus remedis : ô garî suven, ô souldja toujours. Quant « Lou Galetou » ribo, lous eineis se sauven, tout coumo lous rats de granier quant is vesen venî notre gros margau ! »

Si tout lou mounde ecoutavo lou Geai, nous n'aurian segur pas prou de farino per fâ lous galetous, mas lous pouticaris n'en credorian misero !

Queu bougre de Passerau nous n'en renvouyo uno gnorlo, mais plo bravo ! Mas qu'ei quello daus onze gourets et de las die letinas, et lous lectours dau « Galetou » lo counaissent depei loun-tem. Faut trouba quacore mais...

Qu'ei un brave piti tableu campagnard que nous fai passâ Jazillou dau Mas-Batin. Queu piti moucandier nous deipigno no gento fenno de lat, lo Cali, en trin se servi sas praticâs :

*Lo Cali, soun toupî bien calu sur soun ancho
Coumenço a fâ pissâ dins lo bouteillo blancha
Lou lat, lou si boun lat, tout chaud et tout crémou
Que notreis Limougeaus troben si sabourou...*

Mas d'auvî glouglouma lou lat, co met en envio l'ânissou de lo Cali que s'ecalarjo au mitan de lo routo, et pissou coumo no fount, sans s'inquièlâ dau tramway qu'atten... Et Jazillou de rire, et lo Cali de s'eimali !...

Modamo E. G., de Mulhouse, se counlento de fâ rire lous

Alsaciens en lour countan las gnorlâ dau « Galetou ». Qu'ei de lo houno propagando, et co fai veire que lou Lemouzis aimen lo joio.

Per chabâ, veiqui lo bezi que nous counto Marsaudou de Sen-Lionard. Nous n'an pas bien coumprei ce qu'o voulio dire. Deviuoro qui pourro !

« Depei trei meis, lou piti Jan, lou jardinier de lo Valado, vai veire lo Mili, per se maridâ. Mas ô fai durâ lou plasei et lo mmi de lo Mili coumenço de perdre passinço.

» L'autre jour, lo disio a so fillo :

» — Tu devei be counèire si ô l'aimo depei lou tem qu'o te frequento !

» Mas lo Mili repoundet :

» — Co n'ei pas tant aisa devinâ ce qu'o penso. Quant ô ve me veir, ô pren toujours soun grand davantaù bleu, tant rede coumo dau fer blanc, et ne pode pas prou me preimâ per counèire soun sentimen ! »

TOUS LES TRAVAUX PHOTOGRAPHIQUES
sont exécutés par

J. SAPINA

EYMOUTIERS (Haute-Vienne)

TRAVAUX D'AMATEURS — ACCESSOIRES
PRODUITS PHOTOGRAPHIQUES

Déplacement sans frais pour Noces et Groupes

**Tout lecteur dau GALETOU que nous
envoyoro cinq abounomens o be cinq
renouvelamens, oro dret a un abonnomen
per re. Pensaz-li !**

Lous astronômèis daus journaux se troumpen suven, mâ lous barometreis se troumpen pas, surtout quant is venen d'uno meijou de counfianço coumo

GAUTIER-LAVIGNE

13, rue Saint-Martial, Limoges. Téléphone 51-63

Is troubarant dins quello meijou de las lunettas de primier choix et pas char per legi eisa et sei peno l'amusant « Galetou ».

MOTEURS ELECTRIQUES
tous usages

GROUPES ELECTRO-POMPES

MATERIEL ELECTRIQUE
AGRICOLE

" LAW "

Seul Concessionnaire
pour la Région :

EIS BOISMORAND
12, boulevard de la Cité, 12
LIMOGES — Téléph. 26-78

NOUVEAUTES, DRAPERIES, TISSUS, etc...

LECOMTE-CHAULET

Place des Banos, 19-21, Limoges

Un m'o di, l'autre jour, que quello meijou tenio depei cent-an. Beleu pâ tan. Mâ l'ei counegudo di tou lou poi... e pu loin denguero.

Eimandi voulio veire lou potrou. Guei de lo peno a possâ per nâ li parlâ. Li vio do mounde, dô mounde, diria qui baillen tou per re. De vrai, per lou leinâgei, là nuveutâ, lo sedd, degu ne po li fâ coumo i. I chaten dô moudelou de besugnâ a boun pri e tournen vendre a piti benefice. Quei tou lou secre de lo meijou.

Nâ li no ve, voù li tournorei.

